

新修閩鄉縣志

新修閩鄉縣志卷十六

人物

按舊志於人物不分門類至沿梁志之例對於片長小善標曰人物志餘名義殊嫌不雅茲依三原縣志例分爲名賢儒學孝義實行俠烈慈善耆壽七門至舊志有流寓一門本爲楊太尉而作考太尉先世伯僑卽藏書於閩其後代子孫若修若亢琰若仲宣若惠若英皆著籍於閩而死卽葬焉其關係最深不僅一時校書而已亦依三原志例將流寓名義取消於本人名下特書原籍某縣人以示區別古帝仍列卷首以昭尊崇之意新採訪者亦各以類附焉

古帝

女媧氏一曰炮媧又曰女希始媒故祀爲皐媒稱曰皇母皐媒月令作高葆帝太昊同母弟正婚姻爲神媒滅共工氏以治天下都於中皇之陂是爲女皇命臣隨作笙簧用五十絃之瑟於澤邱以郊天侑神聽之極悲乃更爲二十五絃樂乃和治一百

三十年而歿事見通鑑今縣西河中有風陵堆卽媧皇遺蹟也

介山梁氏曰外記載諸侯共工氏與融祝氏戰不勝而怒乃頭觸不周山崩天柱折地維缺女媧氏乃煉五色石以補天論者謂煉石補天之說此列子寓言之妄也蓋是時共工俶亂天常肆殃下土女媧氏代包犧以立極黻共工以祛害以木德王天下本紀謂其功高而並三皇地平天成不改舊物則其復天常而奠地維其功大矣後人誦之謂之補天意亦借言之耳

黃帝軒轅氏按史記黃帝有熊氏少典之子姓公孫名曰軒轅生而神靈弱而能言長而敦敏成而聰明時諸侯相侵伐暴虐百姓帝乃習用干戈以征不享諸侯咸來賓從蚩尤最暴莫能伐帝乃徵諸侯與蚩尤戰於涿鹿之野遂擒殺之諸侯尊帝爲天子代神農氏天下有不順者從而征之未嘗寧居東至於海西至崆峒南至於江北逐葷粥邑於涿鹿之阿遷徙無常以兵師爲營衛以雲紀官舉風后力牧常先大鴻以治民時播百穀草木淳化鳥獸蟲蛾旁羅日月星辰水波土石金玉勞動心力

耳目節用水火材物有土德之瑞故號黃帝生二十五子其得姓者十四人都於軒轅之邱在位百年後鑄鼎成升遐於荆山之陽故邑南相傳有黃帝陵云

名賢

按三原縣志人物傳首列名臣貴能兩門其名臣皆功在天下國家者若賢能則宦至府道或長於經濟而實能辦社會公益者顧吾閩小縣人才缺乏不敢援其例然如楊太尉王龍驤允足當名臣而無愧若後代諸人則僅可入賢能之列故折中取義而曰名賢夫名賢亦豈易稱觀於晚近亦殊寥寥矣願新進譽髦勉思建樹以爲地方增重則私衷所冀幸者也

漢公乘興湖之三老也通鑑漢成帝河平二年京兆尹王尊以御史大夫張忠奏坐免官湖三老公乘輿等上書訟其寃天子復以爲徐州刺史

益陽王粲山曰按師古曰湖縣名今虢州湖城縣公乘以爵爲姓又班表十里一亭亭有長十亭爲鄉鄉有鄉三老是三老爲土著無疑舊志以湖作湖城誤一第

書三老而沒其姓氏誤二祀之名宦列諸職官誤三舊州志以三老非縣令削之
允矣第公乘興一三老耳能上書訟京兆之冤而使天子改易舉錯不賢能如是
乎茲特改祀鄉賢而詳其事於人物俾尙論者有所考焉

楊震字伯起宏農華陰人少好學受歐陽尙書於太常桓郁明經博覽學無所不聞
時人謂之關西夫子客居湖城初震之始祖晉伯僑周王封爲楊侯知六籍有厚乃
藏書於湖城董社之原後迷其所至靖節先生寶震之父也夢伯僑謂之曰予汝始
祖伯僑也所藏書在某處今爾子爲名儒啟而行之此其時矣至明命震求之果得
書皆蝌蚪文字時行八分書而藏書簡編磨滅莫能識遂就其地構堂校焉時學徒
雲集有鰲啣三鱣集講堂下生徒取魚進曰鰲卿大夫之服象也其數三者應三台
也先生自此升矣安帝朝震果至太尉今有堂址泉渠古蹟可考

晉王濬字士治宏農湖城人家世二千石濬博涉墳典嘗從征南將軍羊祜祜深知
待之累遷益州刺史太康初以平吳功拜輔國將軍尋封襄陽郡侯加特進散騎常

侍卒諡曰武初濬置門第寬敞人間其故答曰將以羅弓戟後果然贊曰湖城地靈生此士治墳典素風旗旛大志長炬綿連艘舳千里平吳定功王渾知恥事見廣林記隋張須陀闔鄉人有勇略弱冠從史萬歲討西夏以功授儀同又從楊素擊平漢王暕加開府大業中爲齊郡贊務歲饑卽開倉賑之然後上狀帝知之不責後遷滎陽通守李密率兵攻城須陀拒之密退去須陀乘勝追躡十里餘遇伏發戰死

唐楊元琰字溫卿闔鄉人性孝居父喪七日不食初補梓州司倉參軍遷右羽林將軍與張柬之等謀誅二張進雲鷹將軍時敬暉爲武三思所構元琰知禍未已乃詭計請祝髮事浮圖悉還官封中宗不許未幾敬暉果與難元琰獨免遷刑部尙書以太子賓客致仕

楊仲宣闔鄉人終吏部郎中唐席豫銘曰河之靈華之精人之傑國之楨年不永位

未亨閑泉路兮冥冥空歲陰兮崢嶸

按元琰傳子仲昌終吏部郎中州志序云本一人而人物陵墓俱誤作楊仲宣

王適原籍幽州人善爲詩尤好讀書懷奇負氣時以四科募天下士適笑曰此非吾

時耶卽攜所作書緣道歌咏趨直言試既至對語驚人下第益困久之聞金吾將軍李惟簡年少喜士見之語合遂薦爲衛參軍居歲餘若有所不樂一旦載妻子入閩南山中書舍人王涯獨孤及吏部郎中張惟素比部郎中韓愈日發書訊固辭不起明薛嵩閩鄉人慷慨負志操有治才洪武間累官大理卿謫廣西永樂初安南國王爲黎季犛所殺其孫陳天平自老撾來歸黎季蒼表請還國成祖命廣西總兵都督黃中以兵五千人送歸國中舉崑爲輔行至荜站伏發劫天平崑力戰死之見省志祀鄉賢

范敏閩鄉人博通經史名著鄉閭洪武八年舉秀才擢戶部郎中十三年授試尙書直言敢諫多所建明薦耆儒王本等皆拜四輔官帝以徭役不均命編造黃冊敏議百一十戶爲里丁多者十人爲里長鳩一里之事以供歲役十年一周餘百戶爲十甲後遂仍其制不廢明年以不職罷卒祀鄉賢

金元亮揚州人洪武間任本縣令居官清苦不能歸遂卜居焉詳職官

嵇時中鳳陽泗州人洪武間任陝西興平令左遷闕鄉丞操守清約久之不樂仕竟築隱於闕後嗣蕃衍

強德洪武末累官工部員外郎永樂初營建北京奉勅督工以功受賞卒於工上悼之祀鄉賢

樊敷永樂間爲翰林院庶吉士以通四夷譯字入中書省成祖微行入省見諸臣皆揮扇獨敷以禁院端恭不敢乃賜扇陞禮部主客員外郎手詔以克有效勞朕用爾嘉旌之尋陞郎中終湖廣參議

楊林字宗儒文行超卓景泰間以茂才舉終南豐縣令

姜清景泰丁未進士天順間累官戶部員外郎持身廉謹處事剛方卒祀鄉賢

陳鐸成化甲辰進士宏治間累官戶部員外郎五奉勅典內帑督漕運犒榆林駐古北口總太倉時中使勢烈鐸守正不阿所至有冰蘖聲中使憚之榆林犒銀羨千五百兩三堂以常規餽鐸曰無命而取是盜臣也白於部作數支銷自是遂爲常例冢

宰王公表其最曰歷官五事考稱惟一薦於廷上以歷年滋久茂著勤勞二語勅旌之祀鄉賢

屈義由拔貢生任清苑知縣其地多宦官民久受其殃義至廉幹公正不避權勢宦官斂手避之丁外艱去邑中父老數百人詣闕懇留奪情起復留任數年後以不能與時俯仰遂解綬而歸卒祀鄉賢

屈允高字知雄萬歷辛丑進士初任定陶令廉正不阿以卓異聞調單縣令盡瘁河工多捐已俸工成告歸鄉人善之卒祀鄉賢

張可選崇禎庚辰進士任章邱令居家孝友服官清廉時地方多故城守有方以勞卒於任祀鄉賢

清趙宏猷字贊皇順治辛卯舉人任湖廣麻陽縣令麻民舊不服襦袴公製爲襦袴示之巾幘知恥又製碾磑農器等物以利民用麻民爲樹碑戴德云

杜斷洛陽人順治甲午舉人戊戌進士任北直束鹿縣知縣寄居閩邑

杜允中字仲用順治戊戌進士初授江南蕪湖縣令未任丁母憂回籍補授山東海豐縣令秉性淳厚言動謹嚴睦族教子有古達者風詳太史王露所撰墓表見藝文
屈超乘字邇繩前進士允高孫順治己亥進士任湖廣松滋縣令精神強固才能明辨後引疾歸里松人至今頌之

屈逸乘字閑輿號荊岩順治辛丑進士賦性孝友恬淡寡營康熙十年任山東蒙陰縣令時蒙地瘠民貧驛路衝疲迺勸課農桑撫卹殘庶莅任四載政清刑簡訟獄止息青郡一十四屬擢爲治行第一請終養未獲丁艱歸里悲痛泣血越月而卒人咸服其孝去蒙之日父老子弟涕泣贈別樹碑立祠康熙四十五年士庶呈各憲崇祀名宦詳墓誌銘見藝文

劉溥字澤公康熙丙辰武進士任江南儀真衛署印守備兼管江淮揚州等衛事陞授山西大同鎮標中營都司勅封明威將軍少有膽略技勇過人在任懲除土棍裁革漕運私餽陋規告歸仗義疎財好濟人之急云

員佩蘭附貢生道光年任山西太原縣知縣候選直隸州太原俗多溺女公出示嚴禁又因水渠屢相爭訟公判斷分明俾永享其利民爲建清官亭祀之在籍時值邑捐儲鄉會經費首出百金爲倡其子裴棠道光己亥舉人樂善好施常刻孝經註釋陰隲文送親友以勸善道光二十七年出粟救荒日蒸熟食以散貧民其母孫氏每遇蒸食時惟恐不熟必親自檢點五越月乃止

薛隅堂字節庵同治六年署陝西興安漢陰廳巡檢代理同治事八年補延安府保安縣典史同匪猖獗人民離散隅堂招徠難民各復舊業解綬之時萬民頌德

李步瀛字仙洲咸豐辛亥舉人癸丑進士署四川天全州知州授中江縣知縣有善政解組後寄寓蓉城講書論文剴切詳明呈藝就正者甚多著有易經淺說八銘加批近事錄訓女詞諸書行世

左麟卿字芸亭蘇家村人清生員倜儻有大志同治八年左文襄公戡定回疆時隨襄辦軍需以勤勞補授陝西鎮平縣丞抵制軍人保衛民社佐理縣政紳民頌曰澤

遍生民既陞鳳縣知縣方志振興旋以病不起沒於官囊空無以歸葬其清廉如是李穰華字子實麓台村人同治庚午歲貢生爲人忠信明決勤謹老成鄰人周朝元每遇催糧索債各項惟穰華一言卽照付不疑值荒年嘗散賑濟貧管理邑急公局事務前後凡四次而官民胥無異議光緒十七年修邑志爲總採訪蒐輯頗費心力十九年邑宰行鄉飲酒禮穰華以碩德重望膺正賓首席日當時運昇平與故舊張應鰲姚國楨輩每於壽辰佳日聚飲流連儼有洛陽耆英會之遺風焉

王自得字道軒裴張溝人歲貢生家本素封遇歲大荒能傾倉賑民衆爲匾頌曰惠及鄉閭又收買王合生之女爲婢歲熟卽令引還光緒五年公舉孝廉方正朝考一等以州判用分發山西累署代州知州聞喜縣知縣嘗以六百金助前故任發樞補授絳州鹽捕水利州判護理絳州直隸州知州歷任皆有名譽年逾五旬卽告退淡於榮利不復仕進每遇邑急公局演戲酬客招之輒往與故舊聚談以爲樂或問其在家所爲謂檢閱先世債簿其力能償還者及時清理否則酌量勾消不留後人糾

葛以故沒後數十年而人猶感念不置云

王鴻賓字筵初城內常家巷人少好學勤苦授徒養親登光緒乙酉科拔貢十六年知縣孫叔謙建修黃河石壩鴻賓效力最多保獎州判職遵例分發需次陝垣爲臬司曾銖所特賞給僅先拔署一次二十二年補授乾州州判勤政愛民歷六載如一日二十六年陝大饑乾尤甚鴻賓節廉俸爲災民施粟米棉衣當道奏聞於朝得加花翎升同知銜在任候選知縣越明年授湖北恩施縣權篆均州旋莅本任政績卓著迭計大功一百九次給儘先拔署六次人皆以爲榮幸詎料距恩治百里之沙子地福音教與天主堂構釁戕殺教師七人鴻賓坐失察奪職三十二年襄辦甘肅稅務出力因復原官旋慨政變告卸不復出出卒年六旬有二

王長安字靜先裴張村人由附生捐州吏目署山西忻州直隸州右堂調黎城絳州州吏目過班知縣欽加五品銜在忻任舍金救囚廩生王建屏出獄後送恩同再造牌謝以回籍後任縣急公局總管值民軍起義毅軍往返過境縣知事已逃此時世

局變遣兵戈四起人心惶恐鄉間糧秣差驟無一至者長安以隻身措危局東西支應毫無難色共和告成又任公款局副局長對於地方公益無不熱心辦理云

張克嶷字九峯廟上村人幼孤育於母章既長孝敬備至賦性聰明天資過人舉清己酉拔萃科在縣歷辦學務循循善誘閭邑士子多蒙栽培尤長於經濟歷充公款局長事遇盤根錯節人皆束手無策渠至聲如洪鐘縷析條分判斷如流立爲解決每遇鄉間大小事爲之排難解紛不遺餘力兩造仇怨雪清冰釋人皆異口而交頌焉

李桐字幹生南菴村進士步瀛之五子也其父遊宦四川中江縣生桐步瀛沒桐兄均另爨爭資財惟桐默不一語片瓦尺土一無所取隻身奉母歸郡家貧生活維艱日賴舌耕供母衣膳苦讀不倦卒列邑庠厥後從事公務視公事猶己事革命支應軍差報帳屢被駁桐分析申稟卒得請稍紓民力嗣膺保衛團總股匪猝至支持危局心血焦瘁晚長財務局招待處主住出力尤多卒年五十有六

儒學

按三原縣志有理學文學志士等目茲以閩邑地小人數無多亦不敢援其例
僅總曰儒學凡讀書稽古之士未歷顯宦而少建樹者概入斯選是其所遇不
同非品分優劣也覽者幸原量焉

漢鄭興字少贇開封人少學公羊春秋晚善左氏傳學者師之世言左氏者多祖於
興尤明周官長於歷數自杜林桓譚衛弘之屬莫不斟酌初爲長子令遷蓮勺令是
時當喪亂之餘郡縣荒殘興方欲築城郭修禮樂以化之會以事免去遂不仕客遊
閩鄉王公連辟不就

唐吳融字子華越州山陰人按詩話昭宗龍紀初進士累遷侍御史後爲左補闕拜
中書舍人昭宗反正尋轉戶部侍郎終翰林承旨卜居閩鄉皇天原北後卒塋於營
門右居民寒食清明則祭之融嘗較藝長安歸下第者憾之擁馬不得行難以曉賦
融攬轡而成著有唐英歌集三卷清四庫全書收之

明潘吉字惠迪直隸宜興人任本縣教諭清尙有遠操善詩賦囊空不能歸久之慨然曰乾坤無地不爲家也大河之曲一竿可投豈必江南蓴鱸乃足適哉遂菟裘於閩以唵咏教子爲娛有詩集行於世

楊智幼聰悟十歲曉音律有聲場屋間後以貢授東光教諭淡於榮利遂罷歸家居三十餘年嘯傲吟咏條然塵埃之外代巡張公平贈之詩曰伊洛淵源道有傳中州才俊諒無先八年教澤留安塞千里春風到廣川氣節喜同天地闊文章應若斗山懸此行奏對天顏日許薦高明日月邊

陳舜漁貢生性端慤讀書務躬行實踐作文不喜爲浮靡詞其切理處補註疏之所未備官終稷山訓導鄉人子弟來見者隨其所業與之言人人各厭所欲以去以爲陳先生愛已也蓋爭相德之比於庚桑云享年七十餘卒所著有禿筆稿

楊仕性篤實生平惟知讀書以貢授保定府通判清謹自持署慶都篆不任刑罰訟於縣庭者曉譬曲直已爾百姓化之既去士民爲立碑頌德拂衣歸里吟咏自娛年

七十三卒邑侯受所楊君誄之曰文章華國爲時名儒政事澤民稱古遺愛經年不出戶庭囂紛是厭垂老猶親燈火問學愈勤所著有詩集行世

申學詩少聰穎有大志甫冠充邑庠生才氣奔逸諸生辟易旣而翻然有志於理學砭砭窮究晝夜凝思久之若有所得遂棄去諸生上學使者書曰得鳶飛魚躍之趣厭尋章摘句之煩學使者笑而許之角巾書卷吟弄自恣雖半菽不飽適如也居恆非經傳不讀非光明不蹈非正人君子不交士咸敬事之有司匾其門曰河洛淵源會疾革正冠端坐而逝所著有性學緒言行錄錄行於世

清馮繼京字文起附貢生例貢生鳴皋之子任臨潁縣訓導捐修學宮立爲己齋教士佩其教者有洛西夫子詩歌頌之居家與人和厚且公訓子鑿增生德性問學士林瞻仰康熙六十年捐租百餘石鄉里推重歌頌

師荀字子一廩膳生天資敏捷過目成誦學問該博旁及詩賦書畫醫卜之屬無不備覽其友愛尤可風云